

賤籍改成給舊籍一皆燒毀其相訟奴婢令主掌都官將辛丑  
年以後事自丙子年為始限二年決給傳報都監賤籍成給舊  
籍亦皆燒毀永絕爭端 上從之○十二月庚寅朔北方赤氣  
○壬辰散負崔安宗妻重寶奸其夫表弟金仲明縊殺安宗事  
覺刑曹推鞠仲明逃絞重寶○丙申 上命成均校書兩館監  
督文廟之役○禮曹詳定科舉式始以講經書為初場罷進士  
為生員試 上從之○上幸新宮觀擊毬三日○丁酉 賜韓  
山君李穡米豆百斛且賜酒肉曰卿已老矣宜復酒肉以養體  
氣時穡托佛斷酒肉故有是 命○庚子前開城尹卞南龍娶  
故判書李竦妻廡氏南龍子渾又娶竦女諫官請離異渾妻 上  
允○辛丑東北面都巡問使報咸州民女金珍年二十三喪夫  
守節年至七十二定州人申必年九十九求興府民金夫介祖  
母年三十二喪夫寡居夫介孝養不怠年至七十九歲 上賜  
米各十石復其家○癸卯回禮使金積善至自日本○吾郎哈  
水吾狄介等四人來三國之末平壤以北悉為野人游獵之所